

**Bil. 53**

**Isnin**

**18 November 2019**



**MALAYSIA**

# **PENYATA RASMI PARLIMEN**

*Parliamentary Debates*

## **KAMAR KHAS**

*Special Chamber*

**PARLIMEN KEEMPAT BELAS  
PENGAL KEDUA  
MESYUARAT KETIGA**

## KANDUNGAN

### UCAPAN DI BAWAH USUL BERKENAAN PERKARA TADBIR KERAJAAN [P.M.17]:

- **Masalah Permohonan Daftar Lewat Kelahiran dan Keputusan Ujian DNA**  
- YB. Tuan Chan Ming Kai (Alor Setar) [Halaman 1]
- **Masalah Penipuan Wang Melalui Telefon dan Internet (Macau Scam)**  
- YB. Tuan Khoo Poay Tiong (Kota Melaka) [Halaman 4]

**MALAYSIA  
KAMAR KHAS  
PARLIMEN KEEMPAT BELAS  
PENGKAL KEDUA  
MESYUARAT KETIGA**

**Isnin, 18 November 2019**

**Mesyuarat dimulakan pada pukul 2.30 petang**

**DOA**

*[Timbalan Yang di-Pertua (Dato' Mohd Rashid Hasnon)  
mempengerusikan Mesyuarat]*

---

**UCAPAN DI BAWAH USUL  
BERKENAAN PERKARA TADBIR KERAJAAN (P.M. 17)**

**Masalah Permohonan Daftar Lewat Kelahiran dan  
Keputusan Ujian DNA**

**2.36 ptg.**

**Tuan Chan Ming Kai [Alor Setar]:** Terima kasih Tuan Yang di-Pertua dan terima kasih Timbalan Menteri. Saya ingin menarik perhatian pihak kementerian ke atas kes permohonan daftar lewat kelahiran serta keputusan DNA selepas membuat ujian. Terdapat ada kes permohonan daftar lewat kelahiran di bawah seksyen 12(1) Akta 299 iaitu Akta Pendaftaran Kelahiran dan Kematian 1957, di mana pemohon diminta menjalankan Analisis Pemprofilan *Deoxyribonucleic Acid* (DNA).

Dalam satu kes permohonan di Alor Setar, Saudari Shi Yee selaku subjek yang didaftar, nombor rujukan Bil. 52 dalam JPN.K.SK (S) 163/899/1 Jilid 1 telah diminta untuk menjalankan ujian DNA dengan pemohon iaitu Tan Pei Guan, nombor kad pengenalan 960902-02-5425 pada tahun 2017. Pihak pemohon telah membuat bayaran dan telah menjalankan ujian DNA di Jabatan Kimia Pulau Pinang. Akan tetapi, pihak pemohon serta keluarga tidak mendapat keputusan ujian DNA walaupun telah membuat bayaran. Sijil kelahiran bagi Saudari Shi Yee yang didaftarkan pada Februari 2018 dengan nombor daftar 122535XA juga hanya meletak nama pemohon sebagai pemaklum tetapi bukan dalam ruang bapa.

Minta Menteri menjelaskan bahawa, apakah perbezaan ke atas sijil kelahiran tersebut jika keputusan ujian DNA adalah positif ataupun sebaliknya iaitu negatif. Adakah pihak pemohon berhak mengetahui keputusan ujian tersebut. Oleh kerana nama pemohon gagal didaftarkan

sebagai bapa dalam sijil kelahiran subjek tersebut, minta Menteri menjelaskan apakah prosedur yang membenarkan beliau atau keluarga beliau membuat permohonan kewarganegaraan bagi pihak subjek memandangkan subjek perlu menetap di Malaysia serta mula bersekolah.

Adakah keputusan ujian DNA yang telah dibuat akan dilampirkan oleh pihak JPN sebagai dokumen sokongan semasa permohonan Perkara 15A dikemukakan, memandangkan hanya pihak JPN mempunyai keputusan ujian tersebut tetapi pihak pemohon tiada sebarang salinan keputusan ujian walaupun bayaran telah dibuat.

Minta pihak kementerian menjelaskan juga adakah ujian DNA di luar negara diterima dalam segala urusan permohonan di KDN. Berdasarkan pengalaman, adakah laporan ujian DNA di Malaysia bagi subjek dengan ibu yang bukan warganegara boleh diterima sebagai dokumen sah bagi kedutaan negara lain dalam permohonan passport negara masing-masing. Sekian, terima kasih.

**2.38 ptg.**

**Timbalan Menteri Dalam Negeri [Datuk Mohd Azis bin Jamman]:** Terima kasih Tuan Yang di-Pertua dan terima kasih Yang Berhormat Alor Setar.

Untuk makluman Ahli Yang Berhormat, kewarganegaraan seseorang individu ditentukan berdasarkan kepada status perkahwinan dan taraf kewarganegaraan ibu bapa kandung sewaktu kelahiran berlaku. Buat masa ini, kerajaan hanya menggunakan keputusan ujian DNA sebagai dokumen sokongan bagi mengesahkan pertalian darah seseorang dengan ahli keluarga yang lain khususnya di antara kanak-kanak dengan ibu atau bapa ataupun dengan adik-beradik yang lain dan tidak dijadikan sebagai bukti konklusif dalam penganugerahan kewarganegaraan Malaysia.

Buat masa ini, kerajaan hanya menerima keputusan ujian DNA yang dijalankan oleh Jabatan Kimia Malaysia sahaja sebagai dokumen sokongan berkaitan permohonan dokumen pengenalan diri. Sebarang keputusan ujian DNA yang dijalankan oleh Jabatan Kimia Malaysia akan dimaklumkan melalui surat bertulis secara terus kepada Jabatan Pendaftaran Negara dan juga pemohon. Berhubung dengan lampiran keputusan ujian DNA sebagai dokumen sokongan bagi permohonan kewarganegaraan, beban untuk mendapatkan dokumen berkenaan adalah di bawah tanggungjawab setiap pemohon.

Justeru itu, bagi mendapatkan salinan keputusan ujian DNA pemohon iaitu Encik Tan Pei Guan, nombor kad pengenalan 960902-02-5425 pada tahun 2017, kementerian mencadangkan agar pemohon merujuk terus ke Jabatan Kimia Malaysia dengan cara hadir ke pejabat ataupun melalui e-mel dan telefon bagi mendapatkan salinan keputusan ujian DNA yang berkenaan.

**■1440**

Berkenaan dengan maklumat daftar lewat kelahiran Shi Yee. Berdasarkan semakan ke atas rekod JPN, permohonan daftar lewat kelahiran subjek iaitu Shi Yee telah diterima oleh Jabatan Pendaftaran Negeri Kedah pada 12 April 2015 dan telah diluluskan dengan sijil kelahiran nombor daftar 122535XA pada 14 Februari 2018. Permohonan daftar lewat kelahiran subjek telah dibuat oleh pemohon yang mengaku sebagai bapa kepada subjek. Namun begitu, semakan lanjut mendapati bahawa pemohon gagal untuk mengemukakan sebarang dokumen perkahwinan yang sah dan ibu kepada subjek tidak hadir semasa permohonan dibuat.

Oleh kerana disebabkan ketidakhadiran ibu subjek dan ketiadaan dokumen perkahwinan yang sah, tiada bukti kukuh yang membuktikan bahawa pemohon adalah bapa kepada subjek. Justeru itu, ujian DNA dijalankan bagi mengesahkan dakwaan pemohon dan sebagai salah satu dokumen sokongan permohonan. Selaras dengan peruntukan di bawah seksyen 13, Akta Pendaftaran Kelahiran dan Kematian 1957 (Akta 299), sekiranya maklumat pemohon ingin dicatatkan dalam ruangan maklumat bapa, pemohon seharusnya hadir bersama-sama ibu subjek semasa permohonan pendaftaran kelahiran dibuat. Dalam hal ini, JPN hanya mendaftarkan maklumat ibu tanpa maklumat bapa dalam sijil kelahiran subjek memandangkan tiada dokumen perkahwinan yang sah di antara pemohon dan ibu subjek.

Bagi permohonan kewarganegaraan Malaysia di bawah Perkara 15A Perlembagaan Persekutuan. Bagi kanak-kanak yang bertaraf bukan warganegara, ibu bapa atau penjaga yang sah boleh mengemukakan permohonan untuk kanak-kanak itu memperoleh kewarganegaraan Malaysia melalui pendaftaran iaitu di bawah Perkara 15A Perlembagaan Persekutuan sebelum kanak-kanak berkenaan mencapai umur 21 tahun. Jika telah memenuhi syarat-syarat yang diperuntukkan dalam Bahagian III Perlembagaan Persekutuan, *Citizenship Rules 1964* serta perundangan berkaitan yang berkuat kuasa dalam isu pendaftaran perkahwinan, kesahatarafan anak, peraturan imigresen dan lain-lain.

Bagi permohonan Pasport Malaysia Antarabangsa. Seterusnya, bagi permohonan Pasport Malaysia Antarabangsa, kelulusan dan pengeluaran Pasport Malaysia Antarabangsa (PMA) adalah berdasarkan kepada status kewarganegaraan individu tersebut yang mana, hanya individu bertaraf warganegara Malaysia sahaja yang layak untuk dikeluarkan dengan Pasport Malaysia Antarabangsa.

Manakala, bagi permohonan pasport kanak-kanak mengikut negara asal ibu kandungnya, perkara tersebut adalah tertakluk kepada polisi dan ketetapan negara masing-masing. Kerajaan tidak mempunyai maklumat berkaitan penggunaan salinan keputusan ujian DNA bagi tujuan pengeluaran pasport negara luar dan perkara tersebut hendaklah dirujuk terus kepada pihak

kedutaan yang berkaitan. Berhubung dengan isu persekolahan kanak-kanak kerana masalah berkaitan kewarganegaraan. Seperti yang dibangkitkan oleh Ahli Yang Berhormat, perkara tersebut adalah di bawah bidang kuasa Kementerian Pendidikan Malaysia. Sekian dan terima kasih.

### **Masalah Penipuan Wang Melalui Telefon dan Internet (Macau Scam)**

#### **2.43 ptg.**

**Tuan Khoo Poay Tiong [Kota Melaka]:** Tuan Yang di-Pertua, tajuk ucapan saya pada hari ini ialah masalah penipuan wang melalui telefon dan internet (*Macau Scam*).

Tuan Yang di-Pertua, saya ingin membangkitkan isu penipuan wang melalui telefon dan internet ataupun yang lebih dikenali sebagai *Macau Scam*. Isu ini bukan suatu masalah baru tetapi pejabat saya sering kali dan masih menerima aduan dan laporan daripada mereka yang tertipu.

Oleh itu, saya ingin memohon penjelasan daripada pihak kementerian mengenai beberapa perkara iaitu:

- (i) berapakah jumlah kes *Macau Scam* yang telah dilaporkan untuk tahun 2015 hingga 2019 mengikut pecahan negeri dan berapa ramai yang telah didakwa di mahkamah; dan
- (ii) apakah langkah-langkah yang telah diambil oleh kerajaan untuk mengatasi isu ini khususnya terhadap pihak-pihak yang telah membuat penipuan tersebut.

Dalam kebanyakan kes, mangsa tidak dapat mendapatkan wang semula. Pihak-pihak lain seperti bank juga tidak mahu memikul sebarang tanggungjawab. Oleh itu, saya juga ingin menarik perhatian kementerian supaya menekankan aspek perlindungan terhadap para mangsa atau pengguna. Sebagai contoh, di negara UK, pihak-pihak bank telah mengetatkan prosedur dan perlindungan akaun pengguna untuk mengelakkan penipuan *Macau Scam*.

Selain itu, bank-bank di UK juga mempunyai prosedur untuk membayar balik kerugian kepada mangsa jika kes mereka memenuhi kriteria-kriteria tertentu. Kerajaan juga boleh mempertimbangkan cadangan untuk mewujudkan suatu skim insurans ataupun tabung khas untuk membantu mangsa-mangsa penipuan ini.

Maka, saya memohon juga supaya pihak kerajaan dapat menubuhkan suatu *task force* khas yang melibatkan kementerian-kementerian yang berkaitan dan meningkatkan bekerjasama dengan pihak-pihak lain seperti bank untuk mengatasi masalah ini. Sekian, terima kasih.

**2.46 ptg.**

**Timbalan Menteri Dalam Negeri [Datuk Mohd Azis bin Jamman]:** Terima kasih Tuan Yang di-Pertua dan terima kasih Yang Berhormat Kota Melaka.

Tuan Yang di-Pertua, arus pemodenan dan kemajuan negara turut diperkatakan seiring dengan peningkatan dalam jenayah siber yang tiada persempadanan. Masalah penipuan wang melalui telefon dan internet masih ada dan ianya di tahap yang membimbangkan. Perkara ini berlaku disebabkan masih kurangnya pendidikan dan pengetahuan tentang modus operandi atau bagaimana cara penipuan ini berlaku kepada masyarakat.

Berdasarkan statistik kes *Macau Scam* dari tahun 2015 sehingga September 2019, sebanyak 6,096 kertas siasatan telah dibuka dan seramai 700 orang telah dituduh di mahkamah atas kesalahan ini. Dari jumlah kertas siasatan tersebut, sebanyak RM303,188,748.35 kerugian telah direkodkan. Kementerian Dalam Negeri melalui PDRM sangat memandang serius isu-isu berkaitan penipuan atas talian ataupun penipuan melalui telefon dan internet atau lebih dikenali sebagai *telecommunication fraud. Macau Scam* atau dikenali juga sebagai Ops Pelican merupakan salah satu dari jenayah komersil secara atas talian.

Pelbagai usaha yang telah dijalankan oleh PDRM dalam mengekang sindiket-sindiket penipuan termasuklah meningkatkan penguatkuasaan undang-undang, pengoperasian, tangkapan dan seterusnya menjalankan pendakwaan ke atas mereka yang terlibat dalam penipuan. Secara tidak langsung akan memberi kesedaran kepada masyarakat agar tidak terjerumus dalam sindiket atau kes-kes sebegini sekali gus dapat mengurangkan jenayah ini.

Antara usaha-usaha yang dijalankan oleh PDRM ialah dengan mengadakan taklimat, ceramah dan dialog kepada kakitangan kerajaan, syarikat swasta, persatuan-persatuan, sekolah, universiti dan NGO-NGO. Selain itu kempen kesedaran juga telah dibuat melalui pameran-pameran di kompleks beli-belah serta tempat-tempat yang dikunjungi oleh orang ramai agar trend jenayah ini dapat dihebahkan dan masyarakat sentiasa dapat maklumat modus operandi penjenayah yang terkini.

Pihak PDRM juga telah membangunkan satu portal untuk memudahkan masyarakat untuk menyemak nombor-nombor telefon sindiket dan akaun-akaun bank yang digunakan oleh sindiket dalam urusan pindahan wang mangsa ke akaun sindiket yang boleh disemak melalui portal [www.ccid.rmp.gov.my/semakmule](http://www.ccid.rmp.gov.my/semakmule). Selain itu, satu akaun Facebook "*Cyber Crime Alert Royal Malaysia Police*" juga telah diwujudkan bagi berkongsi dan memberi amaran kepada orang ramai mengenai ancaman penipuan atau jenayah siber. Ini dapat membantu orang awam dengan membuat semakan awal dan mengelak daripada menjadi mangsa penipuan.

Prosedur untuk membuka akaun bank bagi individu ataupun syarikat adalah sangat ketat mengikut Akta Perkhidmatan Kewangan 2013. Pemilik akaun tidak boleh sewenang-wenangnya menyerahkan maklumat perbankan dan butiran kepada sesiapa pun. Apa yang berlaku pada masa kini, kebanyakan mangsa telah menyerahkan butiran akaunnya kepada individu lain tanpa membuat semakan dengan penguatkuasaan sehingga menyebabkan wang di dalam akaun mangsa hilang. Pihak bank akan memulangkan wang kepada mangsa jika siasatan mendapati kecuaiannya adalah dari pihak bank itu sendiri.

Jika siasatan mendapati adalah dari kecuaiannya mangsa sendiri bank tidak mempunyai obligasi untuk membayar semula kerugian mangsa. Kebanyakan kes *Macau Scam* di negara ini apabila siasatan dijalankan mendapati di dalam akaun suspek tiada wang kerana telah dikeluarkan serta merta. Jika siasatan PDRM mendapati wang yang dipercayai hasil dari penipuan masih ada di dalam akaun suspek, wang tersebut akan dikembalikan kepada mangsa melalui prosedur mahkamah dan bank.

Untuk makluman Tuan Yang Dipertua, PDRM sememangnya telah menubuhkan satu *task force* yang dinamakan "*Internet Banking Task Force Group*" yang terdiri daripada PDRM, syarikat-syarikat telekomunikasi (telco) serta institusi bank-bank tempatan sejak tahun 2004. Pada bulan Mac 2019, sebuah Jawatankuasa Teknikal Jenayah Siber yang terdiri daripada PDRM dan MCMC juga telah ditubuhkan bagi membanteras jenayah penipuan *online* ini. Sekian, terima kasih.

**Timbalan Yang di-Pertua [Dato' Mohd Rashid Hasnon]:** Terima kasih Yang Berhormat Timbalan Menteri. Ahli-ahli Yang Berhormat, Mesyuarat Kamar Khas ini ditangguhkan hingga jam 2.30 petang, hari Selasa, esok 19 November 2019.

***[Kamar Khas ditangguhkan pada pukul 2.51 petang]***